

Wárágà Pólò dré tisìle Tìmòtéyò dré dhi ni àlo

Wárágà kònìdhi ni tà àndu ngìle drìdrì dhi

Kònìdhi wárágà Pólò dré tisìle Tìmòtéyò dré dhi ni àlo 'i. Tìmòtéyò nda tá kàdhùrà àlo Yésu ni ka'ilepi, angálépi bvò Asíyà àdhya lésè dhi 'i. Akódhi ni andre tá Yúdà mvá Yésu ni ka'ilepi dhi 'i. Atá ni tá Gírìkì 'i. Pólò kipè tá akódhi adrélé áyi atsiàmú ró, kàtsáró kpà áyi àziàmú ki àlo ró (Tà 'òle dhi i 16:1-3). Amvolásà dhi, Pólò bhà tá akódhi adrélé Èkèlézyà ni drì kobhá ki àlo ró í bvó (2 Tìmòtéyò 1:6).

Pólò adré wárágà kònìdhi ni tisì tà kàdrìkàdrì na dhi i sè. Alo ni, adré Tìmòtéyò ni kodzó adrélé tàmbiga dri mónnyá adrèbhá tá Giká ni tà tadhá kinzò sè Èkèlézyà na dhi ki tà sè. Tàko ko, àyi nda ì adré tá tròle títí tàko i rú, ìndì tábhí ki rú ki atìma rú, adrézó mónnyá ka'ìbhá dhi ki 'o ru lanzí àyi kòfalésè (1:4; 4:7). Ì adré tá kpà làmó mòmá logá, mányàngá àruka ki nyàma be móndí i dré (4:3). Rì ni, Pólò adré tà lazí Tìmòtéyò dri Èkèlézyà ni drì kòma ni tà sè, ìndì tà adrézó Èkèlézyà ni drì kobhá ki kipè dhi ki tà sè. Na ni, Pólò adré Tìmòtéyò ni drì ta, akódhi kàdréró Yésu Krìsto ni màràbà dóro dhi ró, ìndì kàdréró mónnyá Èkèlézyà le dhi ki drì ko dóro.

Tà kàdrìkàdrì wárágà kònìdhi léna dhi ki atìma

- 1) Pólò ni m̀odo f̀ema (1:1-2)
- 2) Èkèlézyà ni tà, ìndì Èkèlézyà ni drì kòbhá ki tà (1:3-3:16)
- 3) Tìmòtéyò ni drì tàma Gìká ni àzì 'òma ni tà sè dhi (4:1-6:21)

Pólò ni m̀odo f̀ema

¹ Ma, Pólò, Yésu Krísto ni àpóstolò, má adré wárágà kònìdhi ni tìsì ma. Gìká àma ki tidrìlépi dhi tùmání Yésu Krísto mà dré adrézó m̀i bha vélána dhi be dhi, ì bhà ma adrélé àzì nda ni 'o dhi àyi.

² Má adré tìsìá m̀i, Tìmòtéyò, áma mvá bàti tà ka'ika'ì na dhi dré. Gìká àma ki Atá ì àma ki Mírì Yésu Krísto be dhi ì kòbhà àyi ki togó tani mí rú, ì kòbhà ámi kizà, ìndì ì kòfè tà kìdrìkìdrì mí dré!

Pólò kodzó Tìmòtéyò Gìká ni tà tadhábhá kìnzò sè dhi ki tà sè

³ Ngóro má dré tá ámi kodzólé má dré tá adrérà'a l̀ile Màkèdòníyà na dhi 'á dhi tìni dhi, mí kògò adrélé Èfésò na, mí kòtáro m̀ondí àruka adrèbhá Gìká ni tà tadhá kìnzò sè dhi ì dri dhi, ì kòtayí tà nda ki tadhama.

⁴ Mí kòtà kpà àyi dré dhi, ì kòtayí adrema tròle tìtí tàko ì rú, ìndì tábhí ki rú ki atìma rú dhi. Angyá ko, tà nda kòdhi ì adré káyì 'o apfòle m̀ondí ì kòfalé. Ì adré àyikya m̀ondí ki ledé Gìká ni àzì bhàle àyi drìgá dhi ki 'o tà ka'ika'ì sè dhi ko.

⁵ Má adré tòlí kòdhi ni fe, m̀ondí ì kàdréro ru le àyi kòfalésè be dhi bvó. L̀ele nda adré angalé

togó lólo ìndì dóro, adrélépi tà ka'í túrúpfú sè ko dhi lésè.

⁶ Móndí àruka ì ku láti dóro nda 'ásè gò, ì dré àyi ki fèzo adrélé tà tàko ki tití àyi kòfalésè.

⁷ Ayi nda ì lè adrélé tátrítrí kúlí tadhábhá ì ró. Di, ì nǐ àyikya tà ì dré adrélé tadhále dhi ki àndu ko, tágba ì dré adrézó tà nda ki tadhá rinyí sè dhi.

⁸ Mà nǐ tàle dhi, tátrítrí kúlí dóro dhi be, à kàdré tà 'o ngóro tátrítrí kúlí nda dré adrélé tàle dhi tǐni dhi.

⁹ Mà nǐ kpà tàle dhi, Gíká bhà tátrítrí kúlí móndyá gyägya dhi ì dré ko dhi be. Be ró dhi, bhà ina tátrítrí kúlí nda móndyá adrèbhá tátrítrí kúlí nda ni ño dhi ì dré, túmǎní móndyá adrèbhá ligilé í rú dhi íbe, móndyá adrèbhá áyi tà ga dhi íbe, móndyá adrèbhá tàkonzì 'o dhi íbe, móndyá adrèbhá tà lólo ató àyi pálé dhi íbe, móndyá adrèbhá áyi lindrì bha ko dhi íbe, móndyá adrèbhá àyi ki tibhá ki tupfú dhi íbe, móndyá adrèbhá móndí ki tupfú todràle dhi íbe,

¹⁰ móndyá adrèbhá ndòtò tà 'o dhi íbe, àgo adrèbhá ayilé àgo íbe dhi íbe, móndyá adrèbhá móndí ki lagí màràbà ro dhi íbe, móndyá adrèbhá kinzò ta dhi íbe, móndyá adrèbhá tà ta móndí ì rú kinzò sè dhi íbe, ìndì móndyá adrèbhá tà twá tadhále tà gyägya rúsè dhi ki 'o dhi íbe.

¹¹ Tà tadhále gyägya nda adré angále Rúbí Tani mǐlanzìlanzì ro Gíká rúku ró dhi dré bhàle má drígá dhi lésè.

Gíká ni togó tani bhàle Pólò rú dhi

¹² Má adré àwoyà ta àma ki Mírì Yésu Krísto dré, dré rinyí afele má dré adrézó áyi àzì 'o dhi sè. Akódhi nò tá ma ngóro mómí í dré kitswálé ka'ile dhi ró gò, áma bhàzo adrélé áyi àzì 'o,

¹³ tágba atú dhi, má dré tá adrézó akódhi ni lodhá, adrézó akódhi ni mómíyá ki mǐ pfo, adrézó áyi ki 'o kónzi lavúlé dhi. Dì, Gìká gò ína áyi togó dóro tadhá má dré, má dré tá adrélé tà nda ki 'o tà nǐma ko ìndì tà ka'ima ko na dhi sè.

¹⁴ Dì àma ki Mírì bhà áyi togó tani kàdrì má rú gò, áma 'ozo gàle tà ka'ika'í sè bǐ, ìndì lèle sè bǐ Yésu Krísto na.

¹⁵ Kúlí kòni i, kúlí bàti kitswálé ka'ile togó wǎyi sè dhi 'i: Yésu Krísto alì byò kònìdhi lé kitswálé tàkonzìbhá ki tidrí dhi bvó. Áyi nda i kòfalé dhi, ma tàkonzì líyí àyi títi dhi ki lavúlépi dhi 'i.

¹⁶ Dì, tà nda sè dhi, Gìká bhà áma kizà, Yésu Krísto kòtadháro áyi togó vwàvwà ma tàkonzì 'òlepi lavúlé nda rú, mómí tà nda ni nobhá dhi ì kòka'íro akódhi gò, lídrì kóná vèsè kólyá dhi ni kisúzó.

¹⁷ Lìndrì i mǐlanzìlanzì be dhi ì kàdré Gìká dré kóná vèsè kólyá! Akódhi nda Ópí kàdrì adrélépi kóná vèsè kólyá, kitswálépi dràle bwà ko, ìndì kitswálé nòle bwà ko dhi 'i. Akódhi Gìká 'i kalóma. Kàdré kònìni!

¹⁸ Ama mvá Tímòtéyò, má adré ámi kodzó ngóro atú pròfétá ì dré tà longólé ámi tà dri dhi tíni, mí kàdréro tròle tà longólé nda i rú, adrézó àdzú tà ka'ika'í àdhya ni bhu dóro.

¹⁹ Mí kàdré kpà tròle ámi tà ka'ika'í rú, adrézó ámi togó líkí adrélé dóro. Mómí àruka ì bhe àyikya tà nda i rǐti gò, ì dré áyi ki tà ka'ika'í

tayízó arílé, ngóro bwátù àruka ì dré adrélé arílé yíandre na dhi t́nì.

²⁰ Ayi nda ì kòfalé dhi, Ìmènýò ì Alìgizándrè be. Má tayí àyi nda ì Sàtánà drígá, ì kònìró àyi kì tàkonzì gò, Gìká nì lodhama tayízó be dhi bvó.

2

Tà zìma Gìká tí móndyá títí ì dré dhi

¹ Drìdrì dhi, má adré àma kì adrúpi kì kodzó, ì kàdréro tà zi Gìká tí móndyá títí ì dré, adrézó tongolé akódhi rú, adrézó kpà àwoyà ta akódhi dré àyi kì tà sè.

² Ì kàdré kpà tà zi Gìká tí ópí ì dré, ìndì móndyá bhàle àyi drìle dhi ì dré, mà kàdréro tà 'o togó be ìrì ìndì kìdrìkìdrì, adrézó tròle Gìká nì tà rú, àma kì tà kàdréro ìndrì be mómí ì m̀lèsè.

³ Tà nda kòdhi, tà dóro k̀tswálépi Gìká àma kì tidrìlépi dhi m̀lèsè dhi 'i.

⁴ Akódhi adré leá dhi, móndyá títí dhi ì kòkisúró lídrì kóná vèsè kólyá dhi, adrézó kpà tà bàti ni.

⁵ Tàko ko, Gìká ngbà 'í àlo kwákwá. Dhya adrélépi áyi totó tà 'o mómí kì kòfalé 'á Gìká be dhi kókpà àlo kwákwá. Akódhi nda Yésu Krísto atsálépi mómí ro dhi 'i.

⁶ Akódhi fè tá áyi t̀ndì ngóro làgí kàdrì fèle móndyá títí dhi kì apázó tàkonzì lésè dhi t́nì. 'O tá tà nda lókyá k̀tswálépi dhi sè, tadházóá dhi, Gìká adré leá dhi, móndyá títí dhi ì kàdrì.

⁷ Tà nda sè dhi, Gìká bhà ma adrélé áyi tà longolépi ró ìndì àpóstolò ro, má kàdréro tà bàti adrézó Krísto nì ka'í dhi nì tadhá móndyá súrú

twá ro dhi i dré. Kòdhi má adré tà bàti ta kòdhya, má tà kinzò ko.

Ago ki tà tòkó íbe Ekèlézyà na dhi

⁸ Má adré di lèá dhi, àgo tíí àrà tíí i 'ásè dhi ì kàdré tà zi Gìká tí, adrézó drígá da kurú na akódhi véna togó lólo sè, togóaswa àko, ìndì káyí àko.

⁹ Má adré kpà lèá dhi, tòkó ì kàdré kítá asó àyi rú tògyá sè, àyi ki làsú kàdréro dóro móndí i mlésè, ngóro dré kitswálé àyi ki lindrì sè dhi tíni. Ì kàdré àyi ki 'o avélé drìbhí tìtì sè yà, óro sè yà, màyìkà i sè yà, kó ngalè kítá làgi ró dhi i sè yà dhi ko.

¹⁰ Be ró dhi, ì kàdré àyi ki 'o avélé tà dóro ì dré adrélé 'òle dhi i sè, ngóro dré kitswálé tòkó adrèbhá tàá dhi ì adrè tròle Gìká ni tà rú dhi i sè dhi tíni.

¹¹ Lè tòkó ì kàdré tà nda nìle togó be liri ìndì ànzimvá kya tíni.

¹² Má ka'í tòkó ì kàdré tà tadhá dhi ko, ìndì ì kàdré àgo i drìle dhi ko. Di ì kàdré tà yi kírì.

¹³ Tàko ko, Gìká bhà tá Adámà 'íká, gò dré gòzo Èvà ni bha ndò.

¹⁴ Sàtánà lití tá kpà Adámà kòdhya ko. Be ró dhi, tòkó tayí ína i Sàtánà dré litilé dhi ni gò, dré Gìká ni tòlì ñòzo.

¹⁵ Di, tágba dré adrézó kònini dhi, tòkó ki adrí ànzi ki tíma sè, ì kàdré tròle àyi ki tà ka'íka'í rú, lèle rú, tà lólo rú, ìndì tà 'òma tògyá sè dhi rú dhi.

3

Ekèlézyà ni drì kobhá kì tà

¹ Kúlí kòni ì, kúlí kitswálé ka'ìle dhi 'i: Dhya ángùdhi adrélépi lovó íbe adrézó Ekèlézyà ni drì kòlepi ró dhi, adré àzì dóro le 'òle dhi kòdhya.

² Dì adré leá dhi, Ekèlézyà ni drì kòlepi kàdré mómí adrélépi tà àko í rú dhi 'i. Akódhi kàdré agó tòkó íbe àlo kwákwá dhi 'i. Kàdré mómí adrélépi áyi tà kisùle dhi kì líkí, adrélépi tà 'o tògyá sè, ìndì kitswálépi lindrì sè dhi 'i. Kàdré mómí adrélépi mómí kì ka'ì dòle í véna togó dóro sè dhi 'i, ìndì mómí tà nìlepi tadhálé dóro dhi 'i.

³ Kàdré wá tsilepi ró ko, làpfubhá ro ko, ìndì lawàbhá ro ko. Be ró dhi, kàdré ína mómí adrélépi togó íbe yàya dhi 'i. Kàdré kpà làfa lovó bhàlepi ró ko.

⁴ Kòni adrélé mómíyá áyi tàndi ni dzó lé dhi kì drì ko dóro dhi be. Kòni kpà adrélé áyi ànzimvá kì líkí dóro, ì kàdréro áyi kúlí yi lindrì sè.

⁵ Angyá ko, dhya àlo kòni mómíyá áyi tàndi ni dzó lé dhi kì drì kòle dóro ko dhi, a ni kitswá Ekèlézyà Gìká àdhya ni líkí ngíni?

⁶ Lè akódhi kàdré mómí Yésu ni ka'ilepi tídhí ro dhi 'i ko, kàtsáro drìkàdrì ro gò, akódhi ni tàbvó tàzo Dzáborò àdhya tíni ko.

⁷ Lè akódhi ni tà kàdré dóro mómíyá ka'ìbhá ko dhi ì mílèsè, à kòkitswáro tà kanyò ro dhi ni bha akódhi rú ko, kòla'ìró kpà bã Dzáborò dré tapélé dhi sílé ko.

Ekèlézyà ni tà líkíbhá kì tà

⁸ Kàdré Ekèlézyà ni tà likíbhá ki tà sè dhi, adré kpà lèá dhi, àyi nda ì kàdré móndí kitswábhá lindrì sè dhi 'i. Ì kàdré túrúpfúbhá ì ró ko, wá tsibhá ì ró ko, ìndì làfa ndabhá túrúpfú sè dhi ì ró ko.

⁹ Be ró dhi, ì kàdré àyikya tròle tà bàti lùzu ró ì dré ka'ile dhi rú togó lólo sè.

¹⁰ Lè à kàdré rè zyà àyi ki tabhì 'íká, di à kòkisú tà àlo àyi rú ko dhi, à kògòró àyi ki bha adrélé àzì 'o Ekèlézyà ni tà likíbhá ì ró ndò.

¹¹ Kàdré àyi ki tòkó ki tà sè dhi, adré kpà lèá dhi, àyi nda ì kàdré móndí kitswábhá lindrì sè dhi 'i. Ì kàdré móndí ki rú tabhá kònzì dhi ì ró ko. Be ró dhi, ì kàdré àyikya móndí adrèbhá àyi ki tà kisùle dhi ki líkí dhi 'i, ìndì móndí kitswálé ka'ile tà tíí ì sè dhi 'i.

¹² Lè Ekèlézyà ni tà likílépi kàdré agó tòkó íbe àlo kwákwá dhi 'i. Kòñì adrélé àyi ànzimvá ki drì ko dóro, móndyá tíí àyi tàndì ni dzó lé dhi íbe dhi be.

¹³ Ekèlézyà ni tà likíbhá ì kàdré àyi ki àzì 'o dóro dhi, ì ni lindrì kisú móndí ì mílèsè ìndì Gíká mílèsè. Ì ni kpà adré àyi ki totó tàtá àyi ki tà ka'ika'í dri Yésu Krísto na.

Tà lùzu ró mà dré ka'ile dhi

¹⁴ Má adré tà kòdhi ki tisì mí dré, gba má dré adrézó mì bha tsàzo mí véna mbèlè dhi.

¹⁵ Dì, má kòtigí tà dhi, mí ni nǎá dhi, móndyá Gíká ni sùrú ro dhi ì kàdré tà 'o àyi kòfalèsè ngìni ya dhi be. Sùrú nda, Ekèlézyà Gíká lídrì ro dhi àdhyà 'i, ìndì dzópá tà bàti dré adrézó àyi totó dríá dhi 'i.

16 Lè mómnyá tíí dhi ì kònì tàle dhi, tà lùzu ró mà dré ka'ile dhi tà kàdrì lavulé dhi 'i dhi be: Krísto apfò tá mómndí ro gò, Tírí Lólo dré akódhi ni tadházó mómndí gyägya ró. Dré agázó ángéló i mi gò, à dré akódhi ni tà longózó sùrú tíí i 'ásè. Mómndí bvò dri dhi ì dré akódhi ni ka'izo gò, Gíká dré akódhi ni dòzo mbàle mĩlanzĩlanzĩ na.

4

Tà tadhálé kìnzò sè dhi i

¹ Tírí Lólo adré tàá ngádra 'á dhi, lókyá kùdù sè dhi, mómndí àruka ki àyi ki tà ka'ika'ĩ tayí, adrézó tatsíle tírí adrébhá mómndí ki lití dhi i vésè, adrélé tròle tà tírí kònzi ì dré adrélé tadhálé dhi i rú.

² Tà adréle tadhálé làsú be kònini dhi ì adré apfòle kìnzòbhá adrébhá tà 'o túrúpfú sè dhi i vélésè. Ayi nda ì tayí àyi ki togó abíle ngóro aya bhàle kàle àtsí na dhi tĩni gò, ì dré gòzo vélé àyi ki tàndi ki tàkonzì ni ko.

³ Ì adré làmó logá mómndí i dré, adrézó kpà mányàngá àruka ki nyàma logá àyi dré. Tàkò Gíká bhà tá mányàngá nda mómnyá adrébhá àyi ka'ĩ, adrébhá kpà tà bàti ni dhi i dré nyàle àwoyà tàma sè.

⁴ Tàko ko, ngá tíí Gíká dré bhàle dhi i dóro. Adré di leá dhi, à kògà ngá nda ki àlo ko. A kàdré di be ngá tíí dhi ki ka'ĩ nyàle àwoyà sè.

⁵ Angyá ko, à adré ngá nda ki bha lólo Gíká kandrá akódhi ni kúlí sè, ìndì tà zĩma akódhi tí dhi sè.

Yésu Krísto ni àzì 'òlepi dóro dhi

⁶ Mí kòtadhá tà nda kòdhi ì àma kì adrúpi ì dré dhi, mí ñì adré Yésu Krísto ñì àzì 'òlepi dóro dhi ró. Mí ñì kpà tadhá dhi, mí lí'wá tà bàti mí dré ka'ile dhi na, ìndì tà dóro tadhálé mí dré lebèle dhi na dre.

⁷ Mí kàdré títì tàko adrèbhá lindrì fe Gìkà dré ko dhi kì ga rè. Mí kàdré mína ámi fe atsálé rinyi ró adrema tròle Gìkà ñì tà rú dhi sè.

⁸ Dhyá kì rúbhá fèma atsálé rinyi ró dhi dóro tsà. Dì, adrema tròle Gìkà ñì tà rú dhi ína dóro lavúlé tà títì dhi ì sè. Tàko ko, dhya adrélépi tròle Gìkà ñì tà rú dhi kìsú ína tà Gìkà dré lazilé lídrì ándrò kònìdhi ñì tà sè dhi ì dre. A ñì kókpà tà lazilé lídrì adrélépi alìle dhi ñì tà sè dhi kì kìsú.

⁹ Kúlì kòdhi ì, kúlì bàti kitswálé ka'ile togó wáyi sè dhi 'ì.

¹⁰ Dì ásà dhi, mà adré àzì kòkóròko 'o adrézó landèle, mà dré adrélé mì bha Gìkà lídrì ro dhi véna dhi sè. Akódhi nda dhya adrélépi mónnyá títì dhi kì tidrí dhi 'ì, lavúlé dhi, dhya adrélépi mónnyá adrèbhá áyi ka'ì dhi kì tidrí dhi 'ì.

¹¹ Lè mí kàdré tà nda kòdhi kì tadhá mónní ì dré, adrézó àyi kì kodzó adrélé tà nda kì 'o.

¹² Mí kòtayí mì dhya àlo dré nòle mónní tàko ró ámi kàdhùrà ñì tà sè dhi ko. Dì, mí kàdré mína tà dóro 'o, mónnyá ka'ìbhá dhi ì kàdréró tà no mí rú, adrézó 'òá mína tìni kúlì tàma na, atsimana, lèle na, tà ka'ìka'ì na, ìndì tà lólo 'òma na.

¹³ Mí kàdré ámi fe adrélé Gìkà ñì Kúlì na àyi kandrà, adrézó àyi kì kodzó, adrézó kpà àyi kì tadhá, tsàle lókyá má dré dra tsàzo dhi 'á.

¹⁴ Mí kòbhe tà tani Tirí Lólo dré fèle mí dré pròfètà kì kúlì sè, bhàgo Ekèlèzyà àdhya ì dré drígá bhàrà'a mí dri dhi 'á dhi ko.

15 Mí kàdré ámi fe adrélé tà nda kòdhi ki 'o togó wáyi sè, mónnyá títi dhi ì kàdréro noá dhi, mí adré lile drìdrì ámi tà ka'ika'í na dhi.

16 Mí kàdré sùle ámi tàndi rú, ìndì tà mí dré adrélé tadhále dhi ì rú landè àko ró. Tàko ko, mí kàdré 'oá kònìni dhi, mí ni ámi tàndi ni tidrí, adrézó kpà mónnyá adrèbhá ámi yi dhi ki tidrí.

5

Timòtéyò ni dri tàma mónnyá ka'ìbhá dhi ki tà sè dhi

1 Mí kòtà tà màlìga ì dri kúlí aswaaswa sè ko. Be ró dhi, mí kàdré mína àyi ki kodzó ngóro ámi atá ì tíni. Mí kàdré kàdhúra ki 'o ngóro ámi adrúpi ì tíni.

2 Mí kàdré kpà tòkó màlìga ki 'o ngóro ámi andre ì tíni, adrézó kyánzi ki 'o togó be lólo ngóro ámi amvúpi ì tíni.

Tàyítokó ki tà

3 Lè mí kàdré tàytòkó adrèbhá móndí àko dhi ki lindrì bha, adrézó àyi ki likí.

4 Dì, tàytòkó àlo dhi kàdré ína ànzi íbe yà, kó ngalè toyó íbe yà dhi, lè àyi nda ì kònì rè zyà adrélé tà 'o àyi ki tà ka'ika'í sè, adrézó àyi ki tàndi ki sùrú ki likí, adrézó tà logó àyi ki tibhá ì dré àyi ki tábhí íbe, ngóro àyi nda ì dré tá 'òle àyi dré dhi tíni. Tàko ko, tà nda tà dóro kitswálépi Gíká mǐlèsè dhi 'i.

5 Tàyítokó adrélépi kalóma bàti dhi adré àyi mǐ bha Gíká véna, adrézó tà zi akódhi tí, adrézó tongolé rúá kítú be ìndì ngátsi be landè àko ró.

⁶ Di, tà'yítòkó adrélépi tatsilé áyì tándì nì lovó 'obe dhi drà ína dre, tágba dré adrézó lídrì íbe dhi.

⁷ Mí kòlázì tà nda kòdhi ì móndyá ka'íbhá ì dri, à kòkitswáró tà kònzì ta àmì kì àlo rú ko.

⁸ Dhya àlo kàdré sùle áyì sùrú ì rú ko, lavúlé dhi, móndyá áyì tándì nì dzó lé dhi ì rú ko dhi, akódhi nda gà áyì tà ka'íka'í dre. Akódhi kònzì móndyá ka'íbhá ko dhi kì lavú.

⁹ Kitswázó tà'yítòkó àlo dhi nì rú bha tà'yítòkó àruka adrélé ledélé dhi kya ì kòfalé dhi bvó dhi, lè akódhi nda nì kóná kòlavú nyadhi-na, ìndì kàdré tòkó adrélépi tá agó àlo kwákwá dhi àdhya 'i.*

¹⁰ Adré kpà lèá dhi, tà akódhi dré 'òle dhi ì kàdré dóro móndí ì m̀lèsè. Kòdhi adré tàá dhi, akódhi tòkó adrélépi tá áyì ànzimvá kì líkí dóro, adrélépi móndí kì ka'í dòle í véna togó dóro sè, adrélépi tà 'o móndyá ka'íbhá ì dré àyì kì màràbà tíni, adrélépi móndí kizà ro dhi kì ledé, adrélépi kpà áyì fe tà dóro kì kára títi dhi kì 'o dhi 'i.

¹¹ Di, kàdré ína tà'yítòkó kyánzi ró dhi kì tà sè dhi, mí kòbhà àyì nda kì rú tà'yítòkó àruka kya ì kòfalé ko. Tàko ko, àyì kì lovó rúbhá àdhya kòlavú àyì kì lovó adrézó tròle Krísto rú dhi dre dhi, ì nì lèá gòle làmó na.

¹² Di ì nì àyì kì tándì kì 'o tàbvó tàle, ì dré m̀ndrà ì dré tá sìle drìdrì dhi nì ǹòle dhi sè.

¹³ Kòdhi íbe dhi, ì nì ru su adrélé tòbvo ró, adrélé tatsilé móndí kì dzó ì 'àsè. Ngbà 'í kòdhi

* **5:9 5:9** A kitswá kpà kúlí tisile Gíríkí ti sè kòni kì ladzá kòni: «...kòlíkí ì ngbà 'í agó dré tá mòle dhi dré.»

ko, ì ni kpà atsa tòkó adrébhá tà tàko ki ta, adrézó tífílé móndí ki tà ì 'ásè, adrézó kúlí kitswábhá tàle ko dhi ki ta dhi ì ró.

¹⁴ Dì ása dhi, má adré tàyítòkó kyánzi ró dhi ki drì ta, ì kògòró mòle, adrélé ànzi ti, adrézó àyi ki dzó ki tà líkí, ì kòfèró láti àyi ki kàribhá dré àyi ki rú tàzo kònzi dhi ko.

¹⁵ Tàko ko, àyi ki àruka ì ku láti dóro 'ásè gò, ì dré dhèzo Sàtánà bvó.

¹⁶ Dì tòkó àlo Yésu ni ka'ilepi dhi kàdré tàyítòkó ìbe áyi sùrú lé dhi, kàdré àyi ki ledé. Kòtayí àyi ki tà lanzile Ekèlézyà dri ko, Ekèlézyà kòkitswáró tàyítòkó adrébhá kalóma bàti dhi ki ledé kòdhya be dhi bvó.

Bhàgo ki tà

¹⁷ Kàdré bhàgo adrébhá Ekèlézyà ni drì ko dóro dhi ki tà sè dhi, à kàdré àyi nda ki lindrì bha vèsè be rì. Lavúlé dhi, à kàdré 'òá kònini àyi adrébhá àyi ki fe adrélé Gìká ni kúlí longó, adrézó kpà akódhi ni tà tadhá dhi ì dré.

¹⁸ Tàko ko, Gìká ni Kúlí adré tàá dhi: «Tí dré adrérà'a lò'wa ató zìle dhi 'á dhi, à kòdrò ti ni ngá nyàle dhi ni logázó drá ko,» ìndì «Lè dhya àzì 'òlepi dhi kònnya áyi landè.»†

¹⁹ Mí kòyi tà adrélé tàle bhàgo àlo rú dhi ko, móndí rì yà kó ngalè na yà tà nda ni nobhá mì sè dhi ì kàdré tàá àyi ko dhi.‡

²⁰ Dhya àlo kàdré tàkonzì 'o dhi, mí kòtadhá tàkonzì nda drá móndyá ka'ibhá títi dhi ì kandrá,

† 5:18 5:18 A kònò kpà Dùtèrònómè 25:4; 1 Kòrìtòbhá ì 9:9; Mátáyò 10:10; Lúkà 10:7. ‡ 5:19 5:19 A kònò Dùtèrònómè 19:15.

móndyá àruka tíí dhi ì kàdréro ngá ro tàkonzì 'òma sè.

²¹ Má adré ámi kodzó Gíká ì kandrá, Yésu Krísto be, ìndì ángéló Gíká dré kipèle dhi ìbe: Mí kàdré tà nda kòdhi ki 'o, adrézó mómí ki no twátwa ko. Mí kàdré kpà mómí kipèkipè ko.

²² Mí kòbhà drígá mómí dri, akódhi ni bhàzo twá Mírì ni àzì 'o dhi mbèlè ko. Mí kòfì kpà mómí ki tàkonzì na ko. Dì, mí kàdré mína ámi tàndì ni líkí adrélé lólo.

²³ Ámi 'a ni tà sè, ìndì ámi rúbhá dré adrélé drà ro rá dhi sè dhi, mí kàdré ngbà 'í yí mvu kòdhya ko. Mí kàdré kpà vínò mvu tsà be.

²⁴ A kitswá mómí àruka ki tàkonzì no ngádra 'á, àkò à tà rè àyi ki tàkonzì nda ki tàbvó ko dhi 'á. Dì, à ni kó mómí àruka ki tàkonzì no àmvolásà.

²⁵ Kókpà kòdhi tìni, à kitswá tà dóro mómí ì dré adrélé 'òle dhi ki no ngádra 'á. Ndìndì tà dóro adrélé nòle ngádra 'á ko dhi ì kitswá àyi ki zu bwà ko.

6

Màrábà kì tà

¹ Kàdré móndyá ka'ìbhá adrèbhá màrábà ro dhi ki tà sè dhi, ì kàdré àyi ki mírì ki no ngóro mómí kitswábhá lindrì wáyi sè dhi ì ró, à kòkitswáro tà ta kònzì Gíká rú ko, ìndì tà mà dré adrélé tadhálé dhi ì rú ko.

² Àyi ki mírì ì kàdré mómí ka'ìbhá dhi 'i dhi, ì kòtayí àyi nda ki lindrì bhàma, ì dré adrélé àyi ki adrúpi 'i Krísto na dhi sè ko. Be ró dhi, ì kàdré àyikya àzì 'o àyi dré dóro lavúlé. Tàko ko, mírì ì dré adrézó àzì 'o àyi dré nda ì, móndyá ka'ìbhá

ì dré adrélé lèlè tò dhi 'i. Mí kàdré tà nda kòdhi kì tadhá mómí ì dré kòdhya, adrézó àyi kì kodzó adrélé tà nda kì 'o.

Gìká ni tà tadhama kinzò sè dhi, ìndì làfa lovó bhàma

³ Dhya àlo kàdré Gìká ni tà tadhá kinzò sè, adrézó tròlè àma kì Mírì Yésu Krísto ni kúlí bàti dhi ì rú ko, adrézó kpà tròlè tà tadhálé lindrì fèzo Gìká dré dhi ì rú ko dhi,

⁴ dhya nda mómí drìkàdrì ro, tà nìlèpi àlomvá ko dhi 'i. Akódhi lovó kònzì íbe adrézó tà kayí mómí íbe kúlí kì tà dri. Tà nda kòdhi adré mómí kì 'o adrélé lovó kònzì bha àyi kòfalésè, adrézó lawàlè, adrézó ru lodhá, adrézó ru no mǐ kònzì sè,

⁵ adrézó kpà tà kayí àyi kòfalésè landè àko ró. Mómíyá làsú be kònzì nda kì tà kisúkisù abíabí gò, ì dré tà bàti tayízó. Ë adré kisúá dhi, adrema tròlè Gìká ni tà rú dhi látì adrézó ngá kisú ásà dhi 'i.

⁶ Tà bàti ró dhi, mà kàdré tròlè Gìká ni tà rú, adrézó lenzélé ngá mà dré adrézó ába dhi kì sè dhi, mà kisú àmakya ngá làgí be kàdrì dhi dre.

⁷ Tàko ko, mà atsá bvò kòndhi 'á drígálé sè. Mà ni kpà go pfòlè 'ásà drígálé sè.

⁸ Dì mà kàdré ngá nyàlè dhi íbe, adrézó kpà kítá asolé àma rú dhi íbe dhi, mà ni lenzé ásà.

⁹ Dì, mómíyá adrèbhá látì nda atsázó ngábhá ì ró dhi ì adré àyikya dhèlè tà adrélépi mómí kì tabhì dhi na. Ë adré kpà àyi kì 'o la'ìlè àyi kì lovó kònzì azaaza ró dhi ì sílè gò, lovó nda ì dré adrézó àyi kì dri lile àyi kì abiabi kisú dràdrà be.

10 Tàko ko, làfa lovó ína tà kònzi ki kárá títi dhi ki kómvo 'i. Móndí àruka adrèbhá làfa lovó bha dhi ì tayí àyi lile vwàvwà ro àyi ki tà ka'íka'í rúsè gò, ì dré adrézó kizà nya lavulé.

Timòtéyò ni drì tàma

11 Di, mi móndí Gíká àdhya ró ni, mí kàdré mína lapalé tà nda kòdhi ì silésè títi. Mí kàdré láti nda adrézó tà gyàgya 'o, adrézó tròle Gíká ni tà rú, adrézó Gíká ni ka'í togó wáyi sè, adrézó ámi lèle tadhá, adrézó ámi togó tsi, adrézó kpà ámi togó yàya tadhá.

12 Mí kàdré àdzú tà ka'íka'í àdhya ni bhu dóro. Mí kòru lídrì kóná vésè kólyá Gíká dré ámi azízó kisúá dhi ngbí, ngóro mí dré tà mí dré ka'ile dhi ni longólé móndí bí dhi ì kandrà dóro dhi tìni.

13 Má adré ámi kodzó Gíká adrélépi lídrì fe ngá títi ì dré dhi mìlésè, ìndì Yésu Krísto tà í dré ka'ile dhi ni longólépi Pòtiyò Pilátò kandrà dóro dhi mìlésè, tàzoá dhi:

14 Mí kàdré tòlí fèle mí dré kòdhi ki 'o togó lólo sè ìndì tà àko mí rú, tsàle kítú àma ki Mírì Yésu Krísto dré dra agòzo dhi tú.

15 Gíká ni Yésu Krísto nda ni 'o agòle lókyá í dré bhàle dhi sè dhi nì. Akódhi nda Gíká rúku ró dhi 'i, Opí kàdrì àlo kwákwá dhi 'i, ópí títi dhi ki Opí 'i, ìndì mírì títi dhi ki Mírì 'i.

16 Akódhi dhya àlo kwákwá kitswálépi dràle ko, ìndì adrélépi adrélé ngádra kitswázó tsàle ànyi làgá bwà ko dhi na dhi 'i. Akódhi dhya móndí àlo dré nòle rè ko, ìndì kitswálé nòle bwà ko dhi 'i. Líndrì ì rìnyí be dhi ì kàdré akódhi dré kóná vésè kólyá! Kàdré kònìni.

Ngábhá ki tà

¹⁷ Kàdré mónnyá ka'ibhá ngábhá ro bvò kònìdhi lé dhi ki tà sè dhi, mí kàdré àyi nda ki kodzó, ì kàdréro drìkàdrì ro ko. Ì kàdré kpà àyi ki mì bha ngá adrèbhá gile ko dhi ì dri ko. Be ró dhi, ì kàdré àyi ki mì bha Gìká adrélépi ngá títi ki afè àma dré adrézó lenzélé ásà dhi véna.

¹⁸ Mí kàdré taa àyi dré dhi, ì kàdré tà dóro 'o, adrézó ngábhá ì ró tà dóro nda ki 'òma sè. Ì kàdré kpà gànzi ró adrélé àyi ki ngá lanzí móndí ì dré togó dóro sè.

¹⁹ Ì kàdré 'òá kònìni dhi, ì ni ngá làgí be kàdrì kitswábhá akilé bwà ko dhi ki lokó àyi dré lókyá adrélépi alile dhi sè, ì kòkisúró lídrì bàti dhi be dhi bvó.

Pólò ni kúlí kùdù

²⁰ Tímòtéyo, mí kàdré tà Gìká dré bhàle mí drígá dhi ki líkí dóro. Mí kògà kúlí tàko adrèbhá lindrì fe Gìká dré ko dhi ì, túmání tà kinzò ro adrèbhá ligilé tà bàti rú dhi íbe. A adré tà nda ki zi «tà nìni», di, tà nda ì àyikya kinzò tà 'i.

²¹ Móndí àruka tàbhá dhi ì kisú tà nìni nda dre dhi, ì tayí àyi vwàle àyi ki tà ka'ika'í rúsè vwàvwà.

Gìká ni togó tani kàdré àmi íbe!

Logo (Logoti)
Logoti (Logo): BUKU TA TIDHI//RU YIZO DHI ADHYA
New Testament

copyright © 2015 Wycliffe Bible Translators, Inc.

Language: Logo

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 10 May 2025 from source
files dated 10 May 2025

942af0a0-42ea-5477-8f1a-fed39823f32b